

四庫全書

集部

欽定四庫全書

文忠集卷二十八

省齋文稿二十八

宋 周必大 撰

記 傳

肖顏堂記

廬陵隱君子梁公克道以書來告曰吾老矣進無求於世退而築堂榜曰肖顏非敢有意道德也庶幾肖陋巷之樂云爾子盍為我記之予頃以童子從公鄉校蒙訓

勵獎與甚至今不遠數千里來須鄙文其何說之辭請
誦異時聞諸函丈者而復公命嗟夫簞瓢之樂顏氏之
極摯也魯論二十篇夫子稱顏子衆矣曰如愚曰好學
許之以用舍行藏而告之以四代之制待之非不重且
大矣然未稱賢也獨於在陋巷則曰賢哉回也賢哉回
也予是以知簞瓢之樂為顏氏之極摯也方顏氏之學
也夫子步步趨亦趨仰高而鑽堅瞻前則在後惴惴
然惟恐交一臂而失之惡在其為樂哉及夫由適衛而

得心齋之妙由心齋而造坐忘之域墮肢體黜聰明離
形去智同于大通于斯時也進以行道為樂退以守道
為樂一性之外無餘事矣抑不知陋巷簞瓢之為華屋
鼎食與華屋鼎食之為陋巷簞瓢與蓋非深造乎道者
不至於此不然則安貧而不怨非食以自約此後世高
人處士之流皆能勉而為之何足為顏子重而夫子申
言其賢也哉今公自少而至壯自壯而至老學師顏子
而貧或過之又築堂揭名曰從容乎其中可謂篤志

不哀者矣揚子曰晞顏之人亦顏之徒也公何遜也雖然貧外也樂內也在外者有目斯可覩而在內者非聖人莫辨也坐無尼父焉別顏回小子何足以識之哉時効官歲滿歸省丘墓尚冀登斯堂請斯樂公其有以語我夫紹興二十四年月日記

川泳軒記

唐以節度使鎮諸道其屬皆得辟置雙旌出都門不待設禮案洗刑印固已撰書詞具馬幣而走處士之廬幕

下多賢豪易耳本朝謀帥間許辟士今皆命諸朝幸而
賢也信可樂也否則相忘乎江湖者有矣尚何樂之云
故君子以為難紹興二十六年春內出玉麟符以吏部
尚書鄱陽侯張公居守金陵且安撫大江之東一年政
平二年教行三年而謠頌興雲溪沈君世德實奉詔從
事于幕府力學而多聞和其外而方其中公前前焉他
日謂世德曰負水築室者非子之解耶是宜闢軒盡臨
觀之美于是披簷以為宇梁空以為閣俯秦淮之支流

面蒼龍之華闕右帶天津東望公堂質而不陋潔而不奢啟扉而夏涼塞向而冬溫春風之朝秋月之夕不必登高騫遠而臨觀之美盡矣既落成或取韓退之徐泗濠掌書記廳石記之語而榜曰川泳所以志賓主皆賢而可以樂此也暇日世德與客飲于斯詠於斯已而歎曰美哉是軒也公之賜而我則居得毋愧乎客曰不然昔羊叔子鎮襄漢造峴山者數矣必與從事鄒湛語故此山之名著于編簡武昌南樓殷浩之徒朝夕登焉向

非庾元規一有不淺之興則斯樓殆且泯泯也賓主相
資何世無之今公斂經綸之才惠此一道回視羊庾盖
雁行也而世德雋才懿行顧湛浩輩亦豈溟倖然弟之
哉吾知今日之川泳後世之南樓峴首也而何愧雖然
二府尚有虛席者公且歸矣世德亦將為東閣奇士矣
後世之人開軒而望臨水而歌儵魚出遊從容或未知
此樂也故吾因名軒之意而道古今難易以告之庶幾
循其本乎二十八年十二月朔東里周某記

詠歸亭記

古者學必臨水故天子曰辟廱謂其圓如璧而壅以水也諸侯曰泮宮水在東西而南通之也古為大邦文風盛于江右而學亦閎大顯敞稱公侯之國獨門臺庠下不與學稱且泮水之制甚戾于古蓋舉武二三已觸闥闥闥之外繞以編戶無所容其疏鑿識者病焉隆興改元冬直寶文閣王公佐之鎮茲土也一年矣令修而政成教明而化行始命撤門臺而新之高明嚴正過者

固已改觀越二年春公率郡丞黃公壆教授林君仲熊
暨諸生臨廷而望焉知江流之邇而民氓一族之蔽之
也厚歸以直使擇閒壤徙焉氓既欣然則毀垣斥墓夷
邱平窪築亭于其上重門洞開直若引繩沂泗之風宛
然在目既落成公榜曰詠歸而屬諸生告之曰昔吾夫
子周流四方惟恐無所用而于門弟子之願仕者每抑
之有異乎此者則與之曾皙是也雖然顏淵問為邦則
又許之何也夫聖人之道猶海也顏淵學海而至焉者

也故仕與毋仕惟其遇而已矣若魯哲者方循涯而未
至故聖人因其審已樂道而與之以勵學者後世不考
乎造道之淺深而謂善點之知時不亦過乎諸生晞顏
者也要必循聖涯而入則水哉學哉學哉水哉其將有
所感發矣林君賢師儒也聞而歎曰太守期諸生厚矣
不可以不記相帥命某記之某曰記必有辭也將以斯
亭之作而記之與則太守善政多矣舍其大而書其細
不可也將因命名之意而記之與太守既言之矣又何

加焉林君不然自有此學百二十年于茲不知閱幾太
守矣而今乃髣髴舞雩之遺意豈不足以見公之復古
前之日人病其通衢也而莫之知議今之日無擾于改
為無費于徒役而偉觀出焉豈不足以見公之膽智臨
江面山風雲百變公不以是景而名亭豈不足以見公
之勸學思樂芹藻有魯侯之頌候望城闕異鄭國之廢
公又不以是義而名亭豈不足以見公之能謙合是四
者而記其歲月使後之君子有考焉茲非辭乎某曰諾

遂書之是年五月十九日

靜暉堂記

顓易治也其民尚氣好義以繳繞誣訕為恥令為政豈
弟則相與心悅誠服官府蕭然至無一事異時宦游者
徒感其風聲之勁勇而不思道之以善又拂而激之民
是以病必有循吏焉然後知其治之果易也會稽陸君
濟其循吏與寬而不縱明而不察其政不勞而成吏兩
衙退庭中可羅雀也一日杖屨逍遙于垣牆之間草木

蔽虧疑必有異乃戒徒役剪伐而芟薙之于是山川城郭雜然在目如新豐之復見燕社之復至也如夸娥之始厝神禹之始鑿也地初屬民君計直售焉其基隆然而高因稍增築為堂三間于其上乾道四年秋八月堂成觴客議以靜暉名之或曰君非有取千家山郭靜朝暉之詩乎此少陵嘆巴夔蕭條而作也今贛令治節度府城中戶數萬車轂擊人肩摩為江南一都會何取斯語哉君曰動者物也觀物之變者我也吾方師齋相容

獄市之言而守老氏烹小鮮之戒當其陽光下燭羣動
皆作遊目俯觀閭里清晏境與意會心融形釋則物雖
芸芸安往而非靜又何間于衆寡喧寂之間乎衆曰善
則疏其語走廬陵求予文為之記予少遊顛顛之八境
蓋飫觀焉惟鬱孤為臺巋然獨高登臨之快甲于城中
然鐫之公館啟閉有時且於舉武為勞凡至者莫不嘆
其瓌偉絕特為有餘而患夫人情物變山容水態不能
留遺觀而寄餘想也今是堂也不崇而不庳近之一樓

觀一人物一巖岫一颿牆如出乎庭戶之間几案之前而居官任職者雖朝夕在焉無遨遊之謗無陟降之勞可以聽民事可以燕僚友可以窮幽興昔之八境至是而九可記也已夫為民父母因俗而治然後得其歡心而身名為之俱泰否則牒訴之繁鞭扑之囂方戚戚然揀過之不暇而何有於燕樂故予本巔之風推君之政以及夫景物之大畧而詳記命名之所自庶幾來者知靜治乃可以樂此毋徒為擾擾以病民且自病也初堂

北有修竹數百挺君為步廡以徑焉又築亭其間榜曰
讀書蓋取昌黎公讀書松竹林之句而寓夫仕而優則
學之深旨是尤可嘉乃併為之書五年十月十四日左
朝奉郎新權發遣南劍州軍州事周某記并書

眉壽堂記

新淦楊君圖南曠達人也年未四十入宜春幕府片言
忤郡丞拂衣掛冠而去不啻如棄涕唾歸築室邑中治
名園釀美酒客至未嘗不飲飲未嘗不醉醉則劇談浩

歌傍若無人如是者三十年嘗出郭四五里入游家原
得異境焉山環水周草木豐茂凡道宮佛寺與夫岩居
而野廬者雖不可盡見然鐘鼓之音相傳雞犬之聲相
聞也其幽邃如此君忻然愛之既卜壽藏于中又築眉
壽堂以為往來游息之所因予弟之有連也求文記之
至于七八而不倦予嘗愛司空表聖棄官隱王官谷布
衣鳩杖日從野老游預卜壽藏遇勝日引客坐壙中賦
詩飲酒史氏以為知命君豈晞表聖者耶何其曠達之

相似也君家在玉笥閣阜之間窮覽其山川而著之書
予方約君共為方外十日遊訪蕭張二仙之遺跡然後
便道過君之堂而一寓目所謂樂哉斯邱者相與論表
聖之高風發晉卿之成室其必有日矣多釀以待予可
也乾道五年十月既望

鄒公橋記

以石為杠謂之倚以石絕水謂之梁古也衛淇晉澳詩
春秋皆大之鄭洧胡為而不梁乎曰洧之有淵龍嘗鬪

焉石其不可為也晉楚之師歲至井木井木猶且堙刊
況于輿梁子產之以乘輿濟也其亦有所不得已也孟
子譏之者何曰孟子論為政所以訓也非譏也然則宜
梁而不梁其可乎距廬陵一里地有市曰富田吉贛閩
粵之商日夜走集置戍兵焉其川濫觴于興國凡數百
里至市而漫春夏若大浸秋冬復病于涉徒扛歲敗津
人要求無藝鄉三老鄒昶慨然念之鳩工運石為梁以
濟其長三百尺衡二十尺其高加衡丈焉醴水為五道

以過舟為屋二十四間以庇行人直欄橫檻翼于其傍
始紹興庚辰迄乾道丙戌乃成靡金穀以萬計于是鄉
貢進士兗州學正田亮功鄉貢進士曾同文帥士子序
而詩之聯為大軸謁記于予予謝不能而廬溪丈人王
公又教之曰美事也毋庸辭予聞力可以興利濟人者
有三郡邑以勢道釋以心富家以貨然勢者或病于擾
而其成也苟心者必藉於衆而其成也緩貨高者又豈
入而嗇出瘠彼而肥己能推惠者幾何人哉今鄒氏貨

未高也而樂善如此是宜一鄉稱之文士賦之鄉先生
詔之予故樂為之書因以釋子產于七百年之疑云五
年己丑十月既望青原野夫周某記并書

贛州州學教授題名記

贛立校官在慶厯中號登元祐始與濟南廬江等七郡
俱置博士紹聖改元又歸其闕于丞相府是時郡人李
朴先之首被茲選距今踰八十年而士言行義者必曰
吾師先之言經術者亦曰先之言文章者又曰先之此

豈一時私毀譽一已私好惡哉公也清江劉君靖之少
嘗奉親學于贛已而去登高第來主教事正身以率下
傳道以解惑士謹曰此異時先之也官舍故有洪丞相
胡貳卿所作記為閱國史登載本末因畧計元祐迄紹
聖凡八年間至者當三四人然不可考矣可考者自先
之始由先之迄紹興之初復三十餘年至者又當數十
僅得一江峰而止然亦托先之之文乃傳士欲沒世而
名可稱觀此其知自勉矣若焦惟一而下則老生可問

案牘可稽故歲月稍脩云淳熙元年十二月一日東里
周某子克書

兵部長貳顯名記

大小司馬著於周官歷代沿革可考也本朝倣唐六典
曰兵部凡民兵廂軍蕃兵剽員武舉投藝武試金吾街
司人兵及大將出征告廟破賊露布鹵簿字圖若蕃夷
屬戶授官封之事皆主之曰職方天下地圖城隍保寨
烽燧之數蕃夷歸明內附之事皆主之曰駕部掌凡輦

輅車乘廐牧雜畜乘其傳驛之政令辨其出入之數曰
庫部掌凡軍器儀仗鹵簿法式隨軍防城什物及凡供
帳之事是為四司而其主判率用他官所謂長貳始以
寄祿而已尚書今銀青光祿大夫也侍郎今正議大夫
也位序既高非宰執侍從鮮能至故方任事時自揚乃
職有如歸班猶弗敢替盡規之義名公鉅卿磊落相望
抑有由也元豐肇新官制尚書從二品侍郎從三品實
坐曹治事名稍正矣而武選隸天官兵政歸西府其職

視唐猶簡況于成周乎雖然古號六卿今日近臣使其
告猷可以沃上心陳力可以大厥官則天下國家將陰
受其賜烏在事之繁簡也若乃自畫于有司視成於胥
吏縱法不爾繩課不爾殿得毋愆乎其五年之間兩以
他官承攝惟亞去秋遂冒真秩恩厚而能薄身勤而才
不逮夙夜以思何愆如之暇日視別部率有壁記記前
人名氏乃起中興之元迄今五十年得長貳百人而兼
行其事者在焉抵牾疏畧有所不免大槩具是矣元祐

二年始置權侍郎從四品明年置權尚書正三品崇寧
改元遵元豐之舊建炎四年復權侍郎紹興八年又復
權尚書而建炎三年嘗詔六曹惟吏部脩官餘長貳互
置近歲以來乃或並除損益時也何常之有故具列于
上俾來者得考觀焉淳熙三年十一月十日朝散大夫
尚書兵部侍郎兼侍讀兼學士院兼太子詹事周某記
并書

兵部侍郎官題名記

本朝除郎之路雖廣而其要有三館閣一也寺監丞二也監司郡守三也近歲室其二卿監或可徑至而即非厯監司郡守不可得其不輕而重也較然矣司列屬四中興初僅嘗脩官建炎三年夏始以駕魚庫以兵兼職方其選清故平居無事多處文學之臣其權重故從軍若將命則往往假以為寵此其大畧也隆興改元之五月復裁內外官于是駕部又當省而適賛讀王府有詔聽留需其遷勿補厥後間嘗并置要為有故而一員之

制定矣某既與聞夏官之政乃刻長貳題名會同舍郎亦告石具以辭見屬老矣不文咕嗶莫能措姑效掌故彙前人名氏且粗記其因革云淳熙三年十二月十日

筠川重修道院記

元祐八年柳侯子儀之守筠也作燕居之堂榜之曰江西道院山谷先生實賦焉後八十有七年眉山蘇侯誦領郡于茲惠以養民廉以持身始至人安之居一年人化之乃新斯堂以無廢前賢之遺跡而永邦人無窮之

觀不遠千里屬予為記予曰山谷翰墨參于前記不可為也抑猶有說焉侯文定公之曾孫也元豐元年冬公自宋幕謫官來筠閱五年乃徙績溪于時道院蓋未創也其成也公得政矣簡靜則民肅平易則民親自朝廷以達於筠好善之化興珥筆之風殄使柳侯得以餘力葺夫治事燕客之所者誰之功也又明年而公復來居三年遂遷海上蓋前後留筠者八歲剛大之氣克焉性命之理窮焉經綸之業豐焉其行誼其語默其文章所

以軌範士民者如父母變移習俗者如師友傳詩傳春秋解老子著古史發聖賢之遺意繕書而藏之以待後之君子皆居是邦之時也夫達而在上膏澤加乎民者既如彼窮而謫居惠其父老子弟者又如此則尸而祝之社而稷之如文翁之在蜀也宜哉雖然翁郡守也化易而施狹故後世雖奉嘗而子孫無聞公輔弼也其化不止乎筠而筠之人賴公尤深者以公居之之久成之之遠也功大而施廣矣宜其三世之才有孫而才以二

千石篤餘慶于是邦天之報施固自有輕重哉書以遺
侯刻之堂上使高安之人世世毋忘公之德于以勸士
大夫之為善者棟宇云乎哉淳熙七年四月七日大中
大夫吏部尚書兼翰林學士承旨兼侍讀兼太子詹事
兼修國史周某記

吉州改修學記

廬陵守朱君希顏以書言曰吉之學故南嚮也郡人蕭
序辰轉輸本道與其守方時可規徙東方據依弗安徙

取城之門相直耳學之次舍以礙盡易吉之人雖未嘗
為士者無不議其非也昔之以科目起者衆矣今不幸
而劣于舊吉之人又曰此東嚮之歆也夫仕有顯晦未
知其學之東向果能為之與而夫子顏孟不得正位則
失之大者希顏之至與教授練文謀所以正之令既出
而士民相勸以成蓋自宣和之乙巳距淳熙之戊申而
學始南嚮其役之大費之多復而從舊與創而為新之
難無以異也願有以記之余聞慶厯中詔天下立學是

時吉學之成最早游于學者最盛而他郡猶未克盡如
詔學制亦隨弛熙寧以後至於宣和天子始屢垂意置
教授員立提學官分常平以儲廩食行三舍貢士而罷
科舉下州遠障無不有學而學法大脩不可復加矣吏
于斯時不推明道術之極至以訓啟學者而徒易其嚮
以致非議重煩後來之改作何哉夫豈以學校美其文
而不加之實意不能安其道于悠久而苟務興役以為
新奇可喜之政而然歟昔文翁興蜀郡之學蜀人由是

以僻陋自恥其文化之流相承至今蓋文翁之故宮猶有存者然則人心之不可磨滅雖土木之不可恃者亦賴以永久也夫自孔子沒而大義分裂豪傑之士迭出講貫罕有得其統紀而學道之興廢亦隨世不同互計勝負苟務于蹇淺而精力不能獨造于深微役其外之可慕而忘其內之可樂喜于其始之以學校為政而弗便于其終之禮義成俗也名日隆而實不究之患也則是學也雖幸而復南嚮矣烏能保異日之不重變乎況

舍其學之邪正而即仕宦之多寡以論學之得失哉余
家于吉三世矣追觀前人立朝多名公卿臨大節則忠
義挺挺而居于鄉者又皆能以文行自勉未嘗不歎人
性之善而思來者之嗣音也故因朱君之請而併著之
以相期夫遠者大者

重立羨堂記

安陸距京師千百里其土風醇厚其士多秀傑其民多
隱德承平時宦遊者樂焉元豐甲子方城范公掌書記

于此官舍西偏有桂甚茂諸子絃誦其下榜曰桂堂去
之三十年間致君致明致虛致厚相繼登第致君嘗記
其事逮宣和己亥某之大父太師潭國公為司錄問堂
已圯視桂已悴乃為增葺而封植之又創草堂于其西
長樂鄭昂命名曰茂實為之銘其云光實美見名樂盛
事同餘愛博者謂伯父試南宮居前列先公釋褐魁多
士同時賜第于集英也今蓋七十餘年堂雖亡而碑故
存紹興改元元祐名相劉忠肅公會孫荀來佐府事訪

求遺址適在解之別園始議修復太守李侯棣欣然助之
不日告成左右植四桂面列三槐而以花竹環其外識者
皆知尚賢勸善之意豈特為觀美而已書來請記歲月某
伏念大父奮身儒科安于銓調三為劇邑未嘗一千光範
先公早負大名雖歷官太學而年弗及強仕厚積嗇取敷
遺子孫肆不肖之孤憑藉休德亦綴末第既不能如孔氏
論譔祖考之美著之後世而被遇三朝顯親揚名之道缺
焉慚卿之譏復有甚于昔人微賢守

二表而出之遺事殆泯泯也反袂援毫願附安陸圖志
之末三年三月二十二日

吉州新貢院記

致治之要在得士得士之要在鄉舉鄉舉之法如何曰
其在周官六德六行六藝是謂三物其別至十有八以
此設教俾為士者講焉學焉因其材而篤焉然後論秀
而升其賢能是固得士致治之要術也近世不然三歲
大比凡于于而來者試其藝爾德與行固未暇問而藝

也者又非古所謂藝也或敷繹先儒之成說或會萃經史之奇字糊姓名于卷首錄試程于別紙擇他州吏而考焉寘諸棘闈限以旬時法令甚脩周防甚密為主司者憊心疲精晝夜分閱往往于百十之中取其一焉幸而中選乃貢于春官其艱如此疑若得士矣反有遺才之嘆獨何與戾于古不適于今通天下皆知之而有司不敢議黜者不敢怨何也其公也非私也雖然謂之鄉舉而考覈付他人去取無定論顧奚以師帥為哉成周

遠矣曷不觀國初之故實乎太平興國中張詠寇準同
試大名詠當為首乃共推張覃文行而先之已而膠東
蔡齊舉進士第一以書薦里人史防而居其次是皆試
文郡治太守得以察其器識任人不專任法有三代之
遺風焉當是時名臣輩出後世永賴其公乎其私乎茲
事體大變而通之必有其漸若夫視舉子之多寡為廣
居以待其來使羣試者泮真優游無攬挹挨擠之患此
則二千石之責也廬陵為江西大州文武盛于諸路承

平時應詔率數千人試無定所學宮佛寺取具一時紹興十四年始度地于糖倉巷為屋二百餘楹其後至者益多無可展之地或畏蹂踐望而去之衆議欲遷久矣紹興壬子大理寺丞胡侯長卿被命出守崇化以禮士節用而愛人政成歲豐銳意改作得五代水軍廢營于城中地廣百畝間民畦而為圃者若干戶乃厚予直而取之鳩工聚材徙舊圖新為屋五百十有八間修廊布席居五之四議道校藝之堂分職蒞事之所視昔大抵加

倍崇墉之外周以通塗高門四闢宛如城闔凡靡錢萬緡粟千五百斛轉運林君浚亦助其費經始閏二月甲寅以五月庚子訖工是秋赴舉者踰萬人冠帶儼然几案繩然盡三日出入無譁場屋之盛前所未有侯與予故人也書來俾記其事予聞邇者近臣論太學補試之弊侍從合辭以為遠稽古制近酌時宜不設官不增費願重教官之選假守貳以權為教養課試升貢之法厥七月哉生明下其議于有司將為成說頒焉復古之漸

于此可見雖由今之學校貢舉而周官之舊典國初之
美意庶幾兼取而並用舉于鄉賓于王皆賢也皆能也
其有日矣是則侯之志也夫是歲十月具位周某記

章氏近思堂記

廣漢蜀名郡綿竹其壯縣也西偏岡阜連延二大溪出
其麓今吏部尚書章得茂家焉蓋自其先大人築室于
斯甫寔於斯茂林修竹景物日新得茂復創大堂于兩
間藏書數千卷榜曰近思屬予為之記予聞之何思何

慮易之神也不思而得聖人之誠也是固不可幾也降
是則思曰睿睿作聖君子所宜勉也雖然均是思也或
近焉或遠焉博學而篤志切問而近思求諸已者也仁
在其中矣深思而淺謀適身而遠志騖乎外者也非吾
黨之士矣思乎思乎可不知所擇乎是故為子必思孝
為臣必思忠祭則思敬得則思義推是以往自修身齊
家至于治國平天下其本皆在方寸之間其效乃著于
千萬里之遠豈不約而易知安而易行也哉昔者詩有

六義脩萬事之理可謂盛矣夫子一言以蔽之曰思無邪殆為此也或者泥古太過遂疑三代直道而行是非毀譽一出于人心之至公曾無越思殊不知古三千餘篇刪而去者十九無邪之思三百篇耳唐棣之華偏其反而豈不爾思室是遠而夫子刪之曰未之思也夫何遠之有舉茲一端去取之意斷可識矣德茂學無不通而尤深予詩予嘗同朝聞其語矣四海之廣家為近萬物之散身為近一身之間人以心為近于斯道也固自

得之子復何言姑附姓名于堂上
紹熙四年五月二十七日東里周某記

即墨侯傳

并序

紹興三年

自昌黎先生為毛穎立傳大雅宏達多效之如羅
文陶泓之作妙絕當世下至色祥杜仲黃甘陸吉
飲食果蓏亦有述作墨文房寶也顧可闕耶予秉
耒餘暇輒為即墨侯傳非敢追蹤前哲始以游戲
云爾

即墨侯松齊人也其先蓋即墨大夫以治行見知威王
既卒官子孫因號即墨氏松少以材事東平王為郎資
性剛介王未之親也會宮中火侍衛奔散獨松馳救得
熄燋頭焉王勞曰乃吾未始知汝何忠如是對曰臣以
歲寒事大王未蒙後凋之賞一旦有急臣故燋王說賞
黃金百斤居頃之東阿膠者亦齊人即威王所烹阿大
夫之後以策說王王以為郎命與松結交相得驩甚松
曰僕與足下所謂膠漆相投雖然知和而和不以禮節

之亦不可行也蓋就有道而正焉膠許諾往見王孫杵
曰朝夕琢磨材遂堅實矣時方嚮儒學擢嚴助司馬相
如等在左右復下郡國求茂異咸以名聞于是東平以
松應詔至長安與魯人楮先生管城毛穎歆人羅文俱
召對甘泉宮上一見大喜即日拜大中大夫凡行幸封
禪征伐檄召有所述作四人未嘗不從上稱之曰松等
朕四寶也元狩元年上欲爵松列侯命刻印內史黯少
文毀松曰漢非有功不侯松以薄技事陛下使補卑衣

之缺足矣封之非是上不聽制詔丞相御史蓋聞賞以
抵功古今之通誼也大中大夫松事朕累載夙夜不懈
厥績茂焉其以即墨千戶封松為即墨侯松入見上曰
使卿復乃祖之舊松頓首謝明年淮安王安來朝數獻
辭賦上與往復論難松預焉日被磨折寢以股削乘間
言君子之交淡以成今陛下以淮南故用臣日濃矣臣
材智有限不足付任使願乞骸骨歸山林上不說顧未
有以易之淮南知上意乃薦麻黥代松黥文采燁然能

曲順風指上研究之以為材十倍松使待詔金馬門未
決旬擢光祿大夫典校秘書浸不用黜又日夜短松松
不能歛望奏云汲黯謂陛下用臣猶積薪後來者居上
信然上由是發怒收即墨侯印綬放歸故郡鬱鬱不得
志道病卒諸子零散或在山中或在巴蜀有居黔歛者
材雖不同貌皆黧黑云松有曾孫號子墨客卿尤能世
其業與翰林主人論長楊者也

徐廣曰按客卿成帝時人此二十五字疑非太

史公語
褚先生

太史公曰松黜俱以薄技奮身王藩出入禁闥

資適逢時故也至其材之優劣世蓋未有定論予以中書令侍上日從二子游得夷考之默天資嫵媚油然可悅責以大節蔑如也松質勁氣清與人交始終不渝世所謂耐久朋者與惜夫輕褊肆吻自取擯斥使其剛柔相濟廸以中和亦可以為成材矣

忠義李君傳


乾道八年

忠興初女真犯金陵吉水楊公守節死官天子既追爵四品即其地立廟又易名忠襄書勲太史編錄諸孤加

賜腴田忠義大節卓卓在人耳目縉紳介冑間皆喜傳而樂道之況于同州之士豈無聞伯夷而立志慕相如而更名者耶今于龍泉李君見之矣李君字彥和名覲父俠早世母勉以讀書一日投筆歎曰天下方擾擾男兒要當搴旗斬將立功邊陲顯名于無窮安能齷齪事章句哉聞大將軍岳飛銜命平度寇即挺身從之會奔母喪不竟其功釋服走淮南以策干張丞相丞相奇其材遣隸淮西總管孫暉麾下積功授承信郎紹興十年

夏番將翟將軍入寇暉分兵禦之君獨與部曲晝夜轉
鬪至西京天津橋南大小數十戰殺傷不可勝計卒俘
翟將君乘勝逐北敵益濟師遂死之時五月二十四日
也年三十有一後一月事聞詔贈君兩官有子與父恩
澤賻卹加等予得子郡人者如此常恨未能訪其家乾
道八年秋君之子思忠實來袖書一通陳義崢嶸予竊
嘉之明日泣而請曰吾父死國時官甚微不得如忠襄
公大顯于世且上許貤恩而思忠適在襁褓不能自列

于有司承天子之命丐公一言傳信四方以附九泉且無使國家旌忠卹孤之恩委于草莽也予曰甄濟詐暗不受祿山逼韓退之謂當附書于史子逢能標白其先人俱當得書今爾死王事名在司勳且有詔俾爾世其祿視甄氏父子蓋易以顯予昔執筆諫太史而不以告今為何道思忠曰不孝之罪昭昭矣雖然里中多名士惡知無位于朝任斯責者第為我書他日司馬遷言荊軻庶幾徵夏無且乎予曰然退為之書



文忠集卷二十八

欽定四庫全書

集部

文忠集卷

二十九至
三十一

詳校官庶吉士_臣李傳熊

主事臣呂雲棟覆勘

總校官進士_臣楊懋珩

校對官學正_臣李巖

謄錄監生_臣于希賢

欽定四庫全書

文忠集卷二十九

省齋文稿二十九

宋 周必大 撰

行狀 神道碑

左承奉郎直敷文閣主管台州崇道觀王公廷

珪行狀

公姓王氏諱廷珪字民瞻其先太原人八世祖該避唐末亂徙居廬陵郡西六十里之何山好善樂施人號長

者偽吳順義元年龍見所居陂田間有異僧云是將為
佛寺公宜北去百里遇三白即止子孫當繁衍且出文
士長者如其言行至安成北之連嶺遇白馬一問其地
名曰大白茅稍前曰小白茅乃家焉季氏保大中龍復
見何山遂為龍田寺今金地寺是也公之在母大父夢
赤文亘天既寤公生人知為文字之祥矣元祐間自連
嶺徙居邑中公時為兒童毅然有成人風年十二三刻
志于學晝夜不息弱冠通經史百家崇寧癸未舍法取

士公一試右諸生何損以對策貶廬陵故工部侍郎郭
公孝友從之學一日聽公講歸以大義告損損驚曰後
來之雋也明年貢辟雍時方銅史學禁士人說詩公獨
與顯謨閣直學士劉公邵吟誦自若丁父憂家事一付
弟姪縣榜其里曰清節未幾芝產塋上木連理人謂孝
友所致大觀間提舉本路學事張公根欲薦以八行公
曰此士之常乃以為異耶辭不就登政和八年第調衡
州茶陵丞邑大俗樸公擇秀士教以學應書者歲增猾

吏文雅善交結脅持橫甚前令丞莫敢治公獨發其奸
言于郡黥徒之至今父老能道其事也先是湖南田賦
不均茶陵尤甚富者受田不受稅以避力役公與令約
凡執役者一毫無所須民既不病役徐下令正其賦不
悛者沒入之自是產與稅偕而役均矣丞丞舊兼造船塲
有部使者嘗薦公既而委公役匠造私器公不可且歸
其章使者大怒會與守倅爭公事遂拂衣去潭帥曾公
孝序挽留再三項之宰掾倪公濤左官來致書願交且

責監司不能容一賢者其為名人所重如此宣和末公
年未五十知時事陷危無宦遊意學道著書若將終焉
邑有蘆溪築草堂其上鄉人號蘆溪先生執經來者屢
滿戶外紹興初州賦屬邑修城期會迫遽公語守令黃
衡軍興民困城幸堅胡為勞人衡告太守守大怒將劾
衡公為衡君盍輕一官全民力乎衡即日解印綬去守
聞愧甚為輟是役趙丞相安撫江西奇衡薦于朝衡欲
扳公固避乃已公雖不仕常懷憂世心事苟宜民必告

于當路宣諭劉公大中李公案皆遣官屬咨訪利病公
盡言無隱二公賴之嘗著論二篇極言治安大盜之害
洪帥李丞相奇其說未及行而去後帥叅政張公守遂
以遺逸薦于朝郡守右史王公洋號儒宗吏師下車以
禮幣邀公虛正堂訪政事即學宮聽公講經一時士大
夫多為歌詩紀賓主之兩賢也十二年今敷文閣直學
士胡公銓以忠言忤時相謫嶺表親交無敢通問公獨
送以詩語峻驚人後數年時相知之命帥臣鞠公謗訕

坐流辰州遠人素重公爭以為師武將馬羽攝郡事尤待公厚公謝曰某罪人也將累公羽曰由公獲譴其榮多矣更遣子受業後遂登科太上更化許公自便時年幾八十讀書益力夜對短檠作細字率宵分乃寢今上即位有薦公者一見語合詔畧曰粹然者儒凜有直節項以言語文字抵牾權臣流落排根殆踰二紀召對便殿敷奏詳華特改左丞奉郎除國子監主簿公以年高求退命主管台州崇道觀令所在州常加存問既歸滋

以道誼化鄉閭無貴賤賢愚一接以試平生工詩至是
格力雄健興寄高遠讀者不知其齒之宿也心畫端莊
自其性人貴珍之乾道六年冬再召赴闕固辭上不聽
勅守臣備舟車禮遣仍以引道日聞踰年始至對內殿
特齎拜跪禮賜坐勞問甚寵上欲留公公固乞歸于是
制詔有司王某年九十餘而智識不衰行義益固錫對
便坐富有嘉言其特除直敷文閣復以崇道俸祿之加
賜寶香茶綵皆異恩也公蒙犯霜雪往來數千里無勞

瘁容明年三月己丑乃得微疾啟手足詞色不亂則其所養可知矣享年九十有三娶同邑劉伯玉女前二十八年卒一子頤一女嫁將仕郎彭飛孫男二人澹閱皆世其業孫女二人所著書有蘆溪集五十卷易解二十卷六經講義十卷論語講義五卷語錄五卷雜志五卷滄海遺珠二卷方外書十卷校字一卷鳳亭山叢錄一卷公學無不通而尤邃于易少嘗師鄉先生張汝明晚自得于言意之表漢上朱先生震文定胡公安國薌林

向公子諱見其解皆歎賞以為必傳公亦不輕示人欲獻公車會詩獄興郡守議收公理掾汪公涓奮曰王君剛介勇于義一紙書招之必來他掾變色云云自請提禁卒挾巡尉捕公守唯唯他掾遂行至則突入公家公談笑就逮家四壁立唯易解鐫篋中卒疑其貨也挈以去他日公歎曰天厄吾書或謂今藏掾家云子頤卜以十年正月丙午葬公本縣清化鄉長賦之原使來速行狀將求銘于胡公惟昔伯父暨先君與公同為政和戊

成進士故知公詳其再召也某適對禁中坐定上問銓
薦詩人朱熹王某卿識之乎某既奏熹出處具言公年
德文章在今未易多得且登第五十三年矣上曰官卑
何故某曰斯人早忤上官晚復流竄官薄所以不進陞
下若安窮悼屈厚加品秩錫之章服足以勸善上曰俟
其至議之明年公至上命寓直西清盖待以卿監去朝
禮某嘗白丞相濟公王某百年故老扶杖造朝意欲掛
其冠神武門丞相能為上言俯聽所請而官其一子非

美事與丞相曰君言是也上必不為老人惜一子官明日又言之丞相曰決矣已而乃不報天其或者欲公子孫自以儒業發聞于世乎敢具列之敬俟筆削謹狀

京西北路制置安撫使孫公昭遠行狀

乾道七年

公諱昭遠字顯叔初名大年改今名其先眉州眉山八世祖長孺起書樓延名士講學蜀人號書樓孫家曾祖著明贈太子少師妣崇國太夫人樊氏杞國太夫人李氏祖杵被遇仁宗參嘉祐政事以太子少傅致仕薨

謚文懿。葬開封子孫遂為鄭州管城人。妣昌國太夫人王氏。萬年縣君賀氏。父詰。歷昌隨信湯三郡守。終承議郎。贈通議大夫。妣碩人李氏。公幼警敏。力學喜屬文。年二十四登元祐九年進士第。時策問首及熙豐。凡不主新法者。皆在末甲。公其一也。調長沙尉。潭帥張舜民文學氣節名天下。奇公器識。厚禮之。教以立身行己之方。丁外艱。除服。主興國軍。永興簿。徽宗初。元舜民自謫籍起為諫議大夫。不數日遷吏部侍郎。公移書曰。明公為

諫臣今天下事可憂者非一不知何所論而遷擢如此其速中外疑焉因條時事所當言者舜民以公書奏曰昭遠非獨曉臣一身進退之分凡今日急務不假臣言畧盡之矣尋辟河東經畧司勾當公事易三帥皆留佐幕府陝西方用師夏人乃窺河東時防秋兵纔五萬散處塞上帥司奉朝命聚師命王舜臣將之敵知有備去犯他路朝廷謂不當擅追舜臣兵入塞帥范鏜徙知河陽并劾主議者時同僚二人有親在公請獨坐遂免官

開四年始會赦起為鳳翔府天興縣主簿政和二年用
薦者改宣德即知亳州譙縣改同知解州安邑縣兼鹽
池皆不赴為永興軍路安撫司勾當公事再任都大提
舉權茶馬司勾當公事熙河路積緡錢四十萬隨軍轉
運使欲以便宜移用公力爭不可漕歎曰吾僚寧有若
人乎未幾漕移帥秦鳳廊延皆首辟公奏再上而本司
爭于朝因是詔茶司官屬他司毋得辟久之執政聞公
名再召審察率以不阿附不得用宣和二年以前請大

夫通判滑州兵馬司吏王實結官橫甚前後守臣莫敢治公一日攝行郡事適有訟實者捕寘獄籍其家贓萬計杖而黥之河溢胙城逼房村埽公督役而歸欲壞吏卒往往潛遁公不為動人以比王尊云孟昌齡既鑿三山創天成聖功二橋而聖功隸滑秋水至橋輒壞都水監挾中貴人歲督繫橋費不貲民破產相踵公條其可省者上之滑當河北要衝時方取燕過師無虛月而州兵凡十指揮沿河埽兵倍之倉廩大匱一日月給稍腐

衆囂甚持挺逐倉官且擁太守以入人皆怙懼公至曉以禍福且徧開倉示之曰汝視此與給汝者果異乎衆帖服公乃白守治其為首者是日微公幾亂用士民舉留再任宣和末盜起河朔或薦公克河北山東路撫諭盜賊勾當公事有旨入覲就除河北燕山路轉運副使詔給中都錢三百萬緡糴米三十萬石餉燕山又計辟其屬十人非常制也數月糴告脩會孟揆以工部侍郎兼水陸轉運使自詭糴米五十萬饟新邊既不足則雜

沙石其中而謂公實為之亦會同列有憾公者亟奏其事貶廣南監酒燕帥蔡靖飛章辨其枉猶降三官領舊職靖康元年召為尚書水部員外郎言者謂京師所發關陝器甲及解鹽鈔綱皆濡滯于道命公措置點檢催促公區處有方以時畢至即計軍器之有餘者請還之使脩西邊又祖宗時解鹽鈔面錢止六千至是增為八千公奏曰以銀折銅錢熙寧中皮公弼之失貼納鈔面錢政和中魏伯芻之貪今復展轉估紐鹽價益貴願從

舊法朝廷皆從之敵圍太原我師多潰欽宗命折彥質
乘傳招集彥質言汾州潰兵二萬過河津乞選朝臣同
陝西帥臣招集任委官部還河東詔命公往公言軍士
逃歸其氣已索理難復遣不若孰令西戍猶冀有功也
又論長安河中不可不為脩今所在州縣調保甲乘城
其實自衛不若擇要害地使控扼不聽初公以六月使
陝而以十月末還京師十一月十四日敵陷洛陽京師
戒嚴西京留守西道都總管王襄移治襄漢欽宗命擇

副襄者使督師陝右中書侍郎何鼎以公聞特除秘閣
修撰西道副都總管與三路帥臣序官仍許便宜從事
公奉詔即以五兵三馬出西門十八日敵騎已過鄭道
梗不能進乃復至京抵南門將道尉氏而都成已守禦
下馬望闕再拜而去道招遺卒得數百人由南陽入商
洛出藍田遂至京兆時閏十一月也制置使錢蓋遣統
制官杜常夏淑將士數萬至京西而潰永興路安撫使
范致虛自稱御前會合軍馬勤王入援所號召諸路之師

公至督其進且曰天子初命四道總管也兵得調發官
得調置財穀得易用急則提師援王室今京師圍急旦
暮望救至逗留可乎言詞慷慨聞者感動又遍檄諸帥
使出師已而環慶帥王似熙河帥王倚各以師來會而
涇原帥席貢秦鳳帥趙鼎鄜延帥張深皆不至公二十八
疏劾之合諸路兵得十餘萬范致虛命馬祐昌統之斬
杜常夏淑于華陰公與致虛同出關俄佑昌遇敵于石
壕千秋間戰敗績致虛還京兆公獨與王似王倚留陝

敵并兵攻陝隘之時西蜀輸金帛助河東公用其屬韓武張延齡計止之河池籍募兵得精銳數千軍甫振而京師陷乃遣使至大元帥府建炎元年五月太上皇帝即位訟公入覲公御下嚴整所過肅然內鄉賊尚虎擁衆數萬餘公遇而破之見太上南都頓首涕泣謝奉使無狀太上慰勉之除河南尹西京留守西道都總管悉以公所提兵數千付御營統制官張俊止以蜀兵數百上道七月至洛收集散亡招撫豪傑調兵陝西河北合

義兵萬餘人柵伊揚使民入保會罷四道都總管以公
為京西北路制置安撫使西師既非所隸悉引去公數
以洛無城池而強敵對境侵牧之狀聞于朝又與諸子
書曰今日捍禦甚難若假一歲庶或可保吾四男二女
今不復念要為忠義死耳汝曹讀聖人書行古人事無
以我為念十二月敵兵來攻公悉衆扞禦驍將姚慶戰
偃師死之公即命將官王仔等奉啓運諸殿神御間道
走行在敵兵益熾公戰益不利而敵已破岐雍隴南侵唐

鄧陳蔡潰兵滿野公猶招集之已而見公麾下單弱欲擁公南公罵曰若等平日衣食縣官不以此時報國今將何為叛兵怒起擊公遂死焉官屬從者皆死二年正月十四日也是秋神禦方至行在四年夏錄公忠義詔贈徽猷閣待制官其子孫三人後以二子升朝累贈左金紫光祿大夫公天資孝友輕財重義尤善卹孤幼教育嫁娶咸有成立遇事剛果議論詳明待人以至誠未嘗附麗干進好學老而不衰與人商論古今及本朝故

實纚纚可聽晚值時艱志大而命不副卒以身殉士論
惜之享年五十八先娶李氏公舅女也累贈和義郡夫
人再娶張氏戶部員外郎岫之女累贈永嘉郡夫人四
子右從政郎監潭州南嶽廟炳文右朝奉大夫知常德
府賁文右朝奉大夫知南雄州憲文右迪功郎右文女
右朝奉大夫前知萬州鮮于璽右宣教郎新知通州胡
倚孫男十人共懿右承議郎知建昌軍南城縣餘未仕
女九人曾孫男女八人公既沒賁文崎嶇兵間訪公柩

于死所赴弔者悼公之忠懷公之惠無不流涕是年八月殯州之六合八年乃克葬于婺州金華縣赤松鄉戴家塢予生晚不及識公南雄君以同里之故求次公事實甚切唯公忠節昭然足以不朽而南雄君罔墜先訓自以才猷發聞于世近臣數薦之所以顯揚其親者固將有在尚奚待予言若夫紀歲月序閏閏以脩太史氏之採擇則亦不得而廢也

左朝議大夫充敷文閣待制致仕柳公約神道

碑 紹興三十二年

上即位之三年冬邊騎大入踰淮涉江蹂我二浙右丞
相克以宣撫使護諸將畏敵不能拒擁衆北去金陵會
稽皆守以近臣亦爰一死不以謝國家其餘望風震懼
鮮有奔問官守者故敷文閣待制柳公約當是時以直
龍圖閣守嚴州悉力扞賊境內既安堵則慨然上書請
糾合諸郡克復吳會上親筆答曰寇陷臨安朕方避地
將士鮮復用命嘉卿請行寤寐不忘卿更審量事宜率士

進討會敵退而止明年三月上念公之忠制詔有司擲約當狂敵猖獗鄰邦紛擾之時力圖禦敵賊無敢犯其以約克右文殿修撰守郡如故十月又詔曰軍興費出無藝吏慢弗虔擲約獨謹賦輸率先程督其進秩一等又明年三月詔曰擲約郡當兵衝而能不辭難不避事益嚴列冊保綏一方朕甚嘉之其以約克集英殿修撰寵數便蕃度越倫輩上心猶未愜也十月遂趣公入對獎勞再三擢尚書戶部侍郎公于是感激奮勵悉力盡

言凡例外宣索皆執奏不進如論吳玠等罪未正非所以勵臣節諸大將提兵入覲各名其家將有尾大不掉之患皆衆人喑莫敢發者會高麗請修貢議遣使報聘上顧廷臣無出公右加試戶部侍郎克其選且有大有意當路忌之諷言者誣以事罷為提舉江州太平觀蓋公之出處大槩如此至紹興壬午公歿十有七年矣其中子右朝散郎江南西路轉運判官大節以書抵某曰先人墓道斲石久矣而辭未刻予嘗列職太史氏知先

人宜詳願以屬于某與轉運君同朝久辭之不可乃取
公節義著于士大夫耳目者表而出之且具載天子制
書所以褒表公者然後考其世次官閥而叙之按柳氏
得姓于展季子孫自魯入楚其後或遷河東或徙汝潁
遂仕江表至公之遠祖有自縉雲徙抗者未幾復遷嘉
禾今蓋為秀之華亭人也曾祖諱昉妣高氏祖諱昌贈
特進妣華原郡夫人陳氏考諱廷俊被遇三朝仕至述
古殿學士贈開府儀同三司妣和國太夫人胡氏公字

元禮登大觀三年第試學官中之授霸州州學教授徙睦州入為辟雖正遷博士改宣義郎充廣親宅宗子博士公深于經術而屬詞粹微大為學者宗仰徽宗雅欲試之命提學福建路學事宣和三年遂召對論內外學政甚悉次乞罷內外官到堂日投牒求官以厚風俗帝說諭旨除郎為權倖沮止得秘書省校書郎四年兼充編修汴都志編類官明年進著作佐郎為府監發解別試所考試官吏印武士內外試奏差互坐失覺察送吏

部注徽州司錄改通判宿州郡僚以事相持牢不可解
公曉之曰某直近許某曲近不孫曲固麗于罪許且干
清議奈何其人愧服勿敢爭人益知公為長者七年召
拜監察御史靖康初兼權殿中侍御史常論三鎮不可
棄改尚書工部員外郎進左司郎官丁父憂服闋以直
謨閣充御營使司參議官遷太常少卿已酉秋車駕將
自金陵移蹕平江公疏言兵可進毋示賊以怯九月除
直龍圖閣知台州未至徙嚴州兼兩浙西路兵馬都監

節制管内軍馬自以忠勞名用未久而罷名稱益重
雖上亦眷公不已居七年復秘閣修撰會侵疆來歸起
知蔡州公被命即行畧無顧避意未幾敵渝平傳檄河
南守臣皆舉城降公獨驛聞復遣使數輩乞師于武昌
得報而後返久用郊恩次對敷文閣前後食祠祿者十
二年紹興十五年秘上章告老九月十五日以疾卒于
家訃聞優贈四官貤恩如故事士大夫皆以不大用為
公惜享年六十有四官自將仕郎轉至左朝議大夫累

贈左宣奉大夫娶魏氏吏部侍郎憲之猶子早卒贈碩人三子大方右從政郎廣德軍廣德縣丞後公一年卒次轉運君也以才自見更內外任使號能守其家法者次大辨右承奉郎湖廣江西京西總領司幹辦公事孫男女十一人公天性至孝和國病甚泣禱于天願損壽以益親和國尋愈其後公竟先兩月卒遺命曰述古葬臨安之西溪我死無他卜諸子遂以是年十二月四日亦葬公西溪去先塋絕數里云世言儒者不適于用此

殆見夫誦說章句敬敬拘拘以儒為名而無其實者爾
公以侍從子當承平時由文學自奮歷踐臺閣純明茂
美不懈于位人固未知其應變如何一旦國步多艱于
橫潰中屹保孤城悉其賦輿欲獎王室用能迎天之休
顯著勲効及擇聘使在選中雖過于諛其節益著儒者
之效至是稍白彼平時號烈大夫以剛明忠勇自任臨
事往往周章顛越膚驚竄竄甚至毀節附賊偷生頃刻
視公施設孰為賢否宜有聲詩以信後世其詞曰孝移

于忠勇出于仁古所謂儒不在斯人當用而迂乃我之
羞名與實違又儒之仇恂恂柳公性行淑均王室多難
其氣始振有力必陳有言必進國如尊安身也何病駕
避海隅公撫一邦敵愾折衝齟其披猖上曰忠哉屢賜
爾祉有華禁路公焉是履沃日之濤誰復安行不憚不
辭惟公竭誠嗟嗟諛言曾不公釋可奪者位莫掩者德
天子是思起守新疆獫狁孔熾毀節相望公驛而聞上
曰遙返次對西廂始卒尊顯誰嗇之年不執事樞考行

察終展也醇儒我作銘詩著其大要既垂無窮亦諗有
廟

興國太守贈太保王公絢神道碑

興國太守安陽王公旣即世之三十二年當乾道四年
春上用公之子清源公簽書樞密院事三日制詔司封
按故事贈公太子少師粵六年冬祀禮成清源公以參
知政事宣撫全蜀復有太子太師之命明年清源公即
拜樞密院使恩數如宰臣又贈公少師九年郊霈遂贈

太保鈿軸錦韜梁其盈囊于是清源公以趣召還朝半
道上書天子願奉外祠歸展先墓既得請則致告焚于
塗下泣而言曰予惟先烈是承有此爵位凡所以發揚
潛德振宣幽光既脩載于訓詞獨隧道之碑久而未刻
小子其何敢安乃以尚書郎陶公泰之狀來請銘按王
氏望于初東漢名霸者號其鄉曰君子鄉自是代為士
族公之遠祖始徙常山真定以財雄北州五季遷博平
又徙湘州今為安陽人也四世祖永錫當國初以明經

起家仕至尚書主客郎中河東轉運使主客生殿中丞
知青州益昌縣悅清修不競鄉里復以王君子呼之後
贈尚書禮部侍郎其葬也龍圖閣直學士趙公師氏為
之誌配張氏賈氏范氏贈樂平廣平博平三郡太夫人
生子五人皆舉進士時謂五龍中子東珣張出也中慶
歷六年進士第嘗典三州年六十一即杜門不出官至
朝議大夫卒年八十二後贈太保龍圖閣待制盛公陶
實銘其墓配劉氏贈慶國夫人太保生同州馮翊縣令

贈少師審禮即公父也母陳氏許氏皆贈福國夫人惟公奕世種德甚施甚遠公又承祖考之休而避其報急家國之病而辭其祿寧羸厥躬以昌後人是生名臣為采輔弼出入將相福祿未艾易曰積善之家必有余慶傳曰非此其身在其子孫其弗信矣乎公諱絢字敏功生而穎異太保鍾愛焉元祐八年奏為太廟齋郎紹聖四年太保薨哀慕如成人年十六少師歿于馮翊欲歸柩安陽而力不給會部使者至公哀經踵門伏地號訴

使者義之率州官賻其行人謂王氏有子矣免喪以將仕郎主大名府成安簿大觀初河北置糴使司且鑄夾錫鉄錢都轉運使梁公子美聞公才辟監磁州裕民第二監兵多不逞園諸重垣棘圍之中邏卒擊柝以衛猶有逸者會詔廢監其徒闔扉謀叛人心亮懼公梯牆入大呼曉以禍福衆唯唯聽命州上其事不報去為陳州南頓尉右使張公來居宛邱一見奇之授六經杜詩自是博極羣書作詩尤豪逸未幾許夫人疾沿檄就醫京師

凡以藝名無不造焉醫感其誠咸願盡力而夫人竟不起公護喪雪行歸鄉終制授蔡州真陽令政和間推行道教青苗役法保甲市易居養安濟漏澤等事有司覲賞趣辦苛擾公獨以身庇民未嘗答責而事以濟上官交薦改宣教郎知大名府崇城縣宣和三年四月河決恩州魏之隄防素固都水使者皆藉以為功調急夫數萬畝薪芻無藝刻期增築蠶麥方登民胥怨苦公職兼埽岸部夫堤上力言堤必不決請俟農隙使者不從公

憂衆潰以便宜散遣傍邑從而效之使者劾其慢事下
府尹轉運使審究兩司力佑公竟得無他童貫宣撫幽
燕凡累朝兵仗數百萬貯北京者皆取以實邊又調民
守烽燧運金穀文書旁午動以軍法繩官吏公知亂將
作投劾還家平墳墓鬻產業南徙蔡州族黨交誚公毅
然不顧求知無為軍之巢縣泣事總累月而金人入寇
衆始服公先見依公者相屬也靖康元年汴都戒嚴四
方勤王兵過縣無虛日公用行營法叔羨舍居之饋餉

素脩無秋毫擾寇閭瑾破黃州將掠舒蘄提點刑獄胡
憲可謀于公公為草檄遣客說瑾瑾即引去時羣盜蠶
起公策巢當江淮衝要乃環邑浚壕因土為城引焦湖
水灌濠中其南以大河為固版築未合而賊李仲者號
李鉄棒擁衆蟻集公率鄉丁拒守伏跪斃一騎賊怒益
治攻具會光堯登極赦至公募士持赦諭賊令欽兵歸
行在仲驚喜下馬拜赦連呼萬歲以書謝公遂趣南京
當是時巢以東郡邑邑然賴公力為多劇盜張遇號一

竄蜂自京東轉剽數州無敢撓其鋒既楚潁陽巢境大震公披甲督民丁乘城手發百矢不俸殺賊甚衆賊謀知南城未合潛以甲士筏湖來夾攻公力戰水濱身中數矢左右殊死鬪賊為小卻而同僚守壁者不能支賊遂登陴公亦創甚或挾公登小舟僅免賊嘆曰吾橫行列城未嘗遇敵如此約其下毋縱火殺人留一夕過池陽聚千艘帆風上江鄂矣制置使劉公光世具以事聞奏公節制淮西兵甲沿江捍禦已而賊復自鄂東下聞

公屯北岸舟不敢泊劉公再上公功詔進秩一等監察御史寇防撫諭淮西路又表公勞有旨留再任壽春康允之移帥浙西辟公幹辦公事建炎三年冬金人陷秣陵車駕幸浙東議者慮敵道寧國踰千秋嶺入於潜詔允之擇官統民兵扼嶺下衆有難色公慨然請行且密謂允之敵勢張甚吳人豈能支若用團結義社四萬退守富陽臨安之險令士庶散保於潜昌化聚江下之舟載倉庫粟帛如富陽空抗城以委之彼來無所掠止無

所資欲濟則舟不可得又聞義社分守旁邑將畏首畏尾不暇我以銳師乘之或可得志此上策也允之不聽行及餘杭有披髮南奔者問何人曰橘商也遇軍于漂陽晝夜疾馳是以獲免彼行如鬼亦且至矣時敵知簽樞周公望帥衆十萬屯姑蘇而允之必阻千秋故自漂陽度獨松嶺掩我不脩公移書告允之幕吏猶疑不實請再遣覘者尋而游騎數百奄至北郭陳桑林中允之大驚出兵禦之知其果敵也皆望風潰城中遂煨燼矣

允之始悔不用公言公在千秋飭脩甚至姦毗乘亂相攻刼公往來彈壓誅其尤無良者人情以安他日州縣吏多被罪惟公用勞遷秩駕還會稽趙忠簡公簽書樞密院事請置計議官四員專治機速賞功事首薦公為之時疆場日駭盜賊所在蟠結公謂宜駐蹕江寧內降羣盜外臨中原失此時不為南北之勢分矣又上急務數條未及行而忠簡公去位公亦請外得知興國軍蓋四年九月也李成之叛分兵據軍治紹興元年五月趣

公之官單車行荊棘中至累日不見人烟八月始視事
賊雖去而官府草創豪右暴橫公竭力爬梳使就繩墨
日夜督屬令招集耕農貸以種糧初至斗米斤鹽率直
三千已而流捕四歸井邑漸復物價亦平二年六月詔
曰王某首奉詔令勞民不怠厥功茂焉可召赴都堂審
察無何言者謂凋郡方倚良守胡可遽奪乃命遷一官
任滿褒擢久之淮南潰卒路進以千人濟江薄境軍無
城壘廂禁兵不滿百公亟乞師于蘄州戍將李山且聲

言悉營兵合擊進聞遁去人謂微公應變有方一邦分
塗炭矣四年力求祠官卜居廬阜日與高僧及隱者游
超然若有所得山人往往携酒候道左公輒與班荆
劇飲年經五十賦詩送人赴南宮云我欲掛冠去君當
衣錦還人歎公之達而不疑將逝也八月十四日乃以
疾卒十月一日葬山南丹桂鄉栗里村殊原山積官右
朝請大夫娶宜人韓氏陳氏皆贈福國夫人二子長即
清源公炎今為觀文殿大學士湖廣安撫使次曰圭終

廸功郎邵武縣主簿孫四人思牧將仕郎早世思齊承
務郎思訥承奉郎一為僧曾孫二人輝承務郎伯煇未
官公才雄氣豪身長六尺餘音吐洪暢飲酒至數斗不
亂談辨滾滾遇事迎刃輒解蓋偉人也中興初士習久
安鮮能自奮于功名公在下位獨表表有聞守巢功雖
不能智勇已可見入浙帥幕言雖不用策慮則遠矣趙
忠簡深知之方入相而公歿其命也夫銘曰遠矣王宗
其來有承如彼大川至公方增問其才學允文且武問

其政事利興弊補士患無時時方艱虞公止一邦而志弗舒士鮮已知知已實相公如相避命也奚悵二者則然壽宜邈綿誰不耄老公又無年天于斯人報施常必畀公以豐胡受也嗇蓋身之逢百年易終以貽後人奕世不窮子既顯矣孫亦未艾刻銘昭之尚勸無怠

權太常少卿贈銀青光祿大夫滕公庾神道碑

淳熙六年

睢陽滕子濟子端為兒童時俱負雋聲踰冠同登崇寧

五年進士第相繼中詞學兼茂科政和宣和中先後入
秘書省為正字為著作佐郎他人方附麗權門躡取顯
宦二公獨恂恂自守滯留儒館泊如也光堯皇帝中興
于南京首用鄉閭之望子濟既由太常少卿登壇盛禮
仍草告天肆眚之文子端旋以博士討論典故蓋其踐
歷往往同時亦或相代人號衣冠盛事會宰相惡陳東
歐陽澈之訐直加以大辟子端即上疏申救且移書相
府復欲面詆之為同舍郎扞止義聚藉藉縉紳間已而

從幸廣陵子濟由左史遷中書舍人子端亦為郎文昌
省攝容臺事駸駸進用矣是歲十二月十八日子端遽
以疾卒不二年子濟遂自諫大夫入翰林登樞府故君
子于子端尤太息焉壽終四十二明年長子瑾挈柩南
渡旋寔于婺州金華縣北山俱胝之原淳熙四年瑾守
通州其弟琛守舒州書來言曰先人早世今五十年賴
遺訓餘澤兄弟分守兩淮銀印青綬追爵二品惟是墓
道有碑而詞未刻死且不瞑敢以為請某舊嘗讀公文

又聞救東澈事欣慕其高節且于二守嘗同朝同僚其
何可辭乃序而銘之公諱庾字子端世居應天府宋城
縣曾祖衛尉寺丞堯臣贈太子少保妣晉安郡夫人王
氏信安郡夫人陳氏祖宣德郎公綽贈太子少傅妣魏
郡夫人張氏魯郡夫人鄭氏父左朝請大夫知鄂州友
贈太子少師妣蜀郡夫人常氏公少力學年十二為文
瘞死禽磨瓦書之題曰雀王墓碑自是盃酒嬉笑率寓
于文見者驚異初仕為將仕郎蔡州新息尉民號清和

縣尉秩滿陞通仕郎調陳州商水丞既中科目循文林
郎為九域圖志所編修官改宣教郎徽宗幸秘書省轉
奉議郎歷承議郎除正字九域志成轉朝奉郎駕再幸
省轉朝散郎遂佐著作進朝請郎丁內外艱建炎初元
起為太常博士轉朝奉大夫擢都官員外郎時庶事草
創賞功補副尉者不可計是非混淆公謂興復大業在
信賞必罰今吏以微文沮所當得而以賕謝予其不當
得何以鼓天下忠義之氣又帖給吏手多假托權勢取

之因轉售于人冒濫滋甚于是隨事爬梳聞諸朝嚴其
籍轉朝散大夫兼權太常少卿初李丞相綱素善公其
論救東澈也當路頗以為憾久稍諒其無他委看定四
方封事公晝夜省閱凡可行者差次潤色類以奉御欲
裨助初政憊心疲精失食飲節坐是致疾吏初儼乘時
為姦公力疾案治之無何長貳佑嚴答之而已公歎曰
吾為郎治一吏不見信况敢望協心為國乎天下事畧
可見矣因忽忽不樂以至于沒縉紳嗟惜公天資明敏

恢宏自信為文章立成下至書算藝術見輒能之惟于仕進不汲汲在館閣踰八年非旅進不至政府日抄異書以廣見聞少師公與弟比登儒科坐上書入元祐黨晚御諸子甚嚴公朝服受教責畧無惰容修身謹行惟恐貽親憂同父昆弟姊妹十五人極其友愛初娶常氏諫議大夫安民女追封信安郡夫人再娶路氏實文閣直學士昌衡女追封咸寧郡夫人五子三女皆路出璫璆早亡次通州次瑋未仕季舒州也長女適右廸功郎

馮揆次適左奉議郎駱仲舉餘不及嫁孫男七人仲通
仲容仲雍仲山仲忱仲恂仲宦仲容廸功郎福州懷安
縣主簿孫女四人長適廸功郎新鎮江府司法參軍呂
祖恕餘尚幼銘曰赫赫祥光龍飛宋都雖雖雁行漸于
鄉閭可用為儀匪直其羽亦有忠言以驚該輔伯兮先
登秉國事樞季止郎潛命也何居天之于人報有先後
不于其身必蕃其胄是生良子剖符相望追爵三品密
章未央公文可傳公行可紀詩以聲之公為不死

文忠集卷二十九

欽定四庫全書

文忠集卷三十

省齋文稿三十

宋 周必大 撰

碑

樞密使贈金紫光祿大夫汪公澈神道碑

紹興二年

十一月

公諱澈字明遠姓汪氏系出新安南唐保泰中徙饒州
浮梁縣曾祖仲宣贈太保妣徐氏衛國夫人祖叔寶贈

太師惠國公妣陳氏益國夫人考俊修贈太師慶國公
妣檀氏秦國夫人三世皆以詩書訓子弟公生穎異幼
從伯兄沆學博覽羣書尤長于春秋登紹興八年進士
第主臨江軍新喻簿徙軍器少監鮑瑫檢察荆湖軍改
吉州州學教授父憂不赴服除教授衡沅二州万俟卨
靖公謫沅知公可任重二十六年入相薦召為秘書省
正字兼實錄院檢討官遷校書郎國史院編修官安分
無求視同舍郎數遷殊不介意二十九年二月輪對論

立國二道曰文與武宜令帥臣監司舉所部大小使臣
智謀深遠可脩鎮防武藝超絕可帥士卒者在內則侍
從臺諫各薦所知務得其實實則精不必求多多則泛
母問小疵毋拘常制高宗嘉納即詔內外薦舉武臣而
擢公監察御史尋進殿中侍御史特賜鞍馬和戎浸久
邊防懈弛公力陳養賢養民養兵及自治豫脩之說反
覆累數千言其他如有司毋得援例破成法併廢教坊
皆自公發之顯仁皇后攢宮既訖上議者欲廣四隅凡

士庶墳在二十里內皆當遷公言陰陽家說難信與帝
意合命公按視公還奏昭慈徽宗顯肅懿節四陵園舊
占百步數十年何今日為是紛紛且漢長樂未央宮夾
塹里疾墓未嘗遷也唐張說坎其宅東北隅人謂洩王
氣今就如議者言則穿穴隴丘恐非徒無益按國朝宮
陵儀制在封堆界內不許開故合祔願遷出者聽其意
深矣帝大悟一切如故三十年知樞密院事葉公義問
使敵歸頗知入寇之謀公申言選將帥為兵備八月遷

侍御史賜緋衣銀魚時酒課虧國用不足公請禁私酤
或遂意以贍軍庫付殿前司公言兵權利柄出于一他
日將不可制又論鎮江大將劉寶十罪乞行誅斥又論
往歲經界法行隱陋稅多諸郡經總制錢一時羨溢嗣
歲即虧今乃以為額必至病民願詔戶部別取十年通
數而用其中事皆施行當國者多過舉公疏罷之明年
上元前一日風雷雨雪交作春大寒有旨令侍從臺諫
條具消弭災異之術公謂天變不虛其應在兵今荆襄

無統督江南之脩禦凡陳十二事皆內修外攘計會詔
政事並用祖宗舊制公言近歲武爵遷轉太驟請復六
等檢校官總管鈐轄路分都監除授超躡當遴其選於
是詔兩省詳議其後稍復舊制云敵使高景山因賀天
中節報欽宗升遐且索將相求釁公請置使江干益兵
上流守淮甸脩海道然後下哀痛之詔布告中外是月
除御史中丞遣大將成閔禁旅五萬屯荆襄而公遂為
宣諭使大率前後所陳詔書畧曰撫勞將士體訪事宜

凡其所臨如朕親幸公自以身任言責凡川陝江淮利害悉以聞由鄂渚歷江陵走襄陽具宣天子恩意拊循諸軍勉將帥以忠義人人感激思奮時田師中戍鄂李道戍荆吳拱以蜀兵戍襄成閔屯鄂間公以師中老病劾去之襄披成為山寨荆治水堡公曰此特自守計耳敵至當力戰逐北奈何坐困乎乃部分諸將乘邊還武昌調軍食九月金犯信陽光化諸將戰却之俄敵兵大至與我軍相持公乞下詔進討而駕幸金陵乃升閔

京西河北西路招討使竇聽宣諭司節制公欲乘完顏
亮駐淮南擄諸將分兵出唐鄧陳蔡直擣京洛使亮腹
背受敵可成大功會兩淮失守驛召閔軍入援公志不
就惟以荆襄軍當敵將劉萇十萬之衆頃之謀報敵謀
自光黃渡江襲武昌入江西詔拱分兵還戍江岸拱即
將而南公在武昌馳書拱還襄陽自調鄂之餘兵悉戰
艦聲言脩光黃敵計不得行拱僅抵峴首敵師掩至大
戰漢水上敵衆敗走唐鄧陳蔡汝穎相次歸職方未幾

亮死公乞出兵淮甸與荆襄軍夾擊其歸師未報而金
之新主罷兵請和矣三十二年春駕留金陵公請奏事
詔需後公復條奏便宜三月趣公朝臨安虛政府以待
甫入對即拜叅知政事六月內禪公與宰相陳魯公及
二樞臣俱膺佐命之寄壽皇既御極銳意恢復首用張
忠獻公使江淮而命公督視荆襄軍馬將分路進討公
開府襄陽遣趙搏守唐王宣守鄧別選偏將分據要害
皇甫倜擁衆萬餘柵陳蔡間未有所屬公請賜軍號官

爵果為名將初蜀師頊德順軍為敵所圍公欲以兵助
個牽制之會上命中使梁珂齎手筆勞公曰卿文武兼
資帷幄大臣以戰以守臨機制變公因奏敵方併力拒
西師宜分命趙搏王宣潛師襲洛乃令兩淮犄角中原
遺民必響應一舉可定豈特解西師而已是時敵移文
江淮督府議和復揚言入寇上慮公銳于進取諭旨未
宜分兵遠畧公念襄漢宿兵饋糧艱阻昔之沃壤彌望
荆榛乃與漕臣呂擢姚岳議因右長渠築堰通流募閒

民汰冗卒十人為甲五甲為隊三隊為屯授地給牛各有等差賦之種穀授之廬舍而薄其課秋成第輸種餘穀官以緡錢市之畫為三十八屯規模詳密人方勸趨而西師退保敵勢遂張蓋隆興元年也宸翰數飭修遘脩公請入奏軍事上復遣內侍甘澤賜親札曰入寇無虞可暫入覲仍賜金合茶藥非常典也公方歸武昌候命而張忠獻公先入朝密以迎降敵為名克期大舉雖宰相亦不與聞詔公出師應之公以前議驟變上奏曰

敵自得志陝右陳兵壓境姑遷延避盛夏將期秋冬一
決和戰後先發固善獨未知能度彼已有必勝之策否
願許臣入對面論形勢詔可而我師已踰淮公知言不
用乞令張公併領荆襄號令歸一俄李顯忠師潰公道
乞奉祠除資政殿學士提學臨安府洞霄宮言者隨攻
之落職台州居住明年冬有旨自便經兩月復端明殿
學士知建康府視事於乾道元年春上浸察前謾深念
公之功九月召知樞密院事遂升樞密使立頒恩數並

同宰臣公以南渡後非舊相若官至公孤不以拜再三
辭上曰卿將命馳驅經歷為多故授此職嘗密訪人才
公舉所知百餘人第其材器復于上二年引疾上固留
不能奪以觀文殿學士再領洞霄越三月起知鄂州兼
管内安撫使蓋上知公兩使荆襄有經武整軍之勲將
以規恢也繼訪公邊事公奏向者我有唐鄧為藩籬又
皇甫倜控扼陳蔡間金兵不敢窺襄比既失兩郡倜復
內徙敵屯新野相距百里耳嘗令趙搏王宣築城郭儲

芻糧守脩要害首尾相應有以待敵衆心乃安為今之計無以易此至于機會之來固難豫定臣職在守土不得而知也上深然之每以上流謗公議臣欲廢江州軍公力言不可而止公以和好方堅上章求歸和知寧國府便公之私四年改知福州兼本路安撫使海寇為亂公遣兵捕渠魁戮之十月得末疾再請洞霄七年遂告老上雖知公疾猶令降詔不允曲示禮意尋特轉通奉大夫許致仕八月二十三日召其子授遺奏大指而薨

年六十有三特贈金紫光祿大夫官其後十人積階自
迪功郎至三品皆特遷爵鄱陽郡開國公食邑二千三
百戶實封五百戶有司定謚曰莊敏以九年二月乙酉
葬邑之南鄉湘湖長穆山之原娶同邑李氏封榮國夫
人後公九月薨子男四人皆通敏捍今為朝請大夫提
廣南路市舶梓朝請郎知盱眙軍械通直郎新通判撫
州獨其季承奉郎隆興府監倉櫛早世女三人適李師
心王源方恬孫男十五人光熙烈勲燧照耀燭杰照媚

煇炬焯炎孫女七人公學本誠敬不專誦說每務躬行
嘗從容奏高宗曰臣起家寒遠所以報國惟無私不欺
耳及事重華亦云退以名所居二齋天性孝友自以祿
不逮親每沾俸賜感愴彌日憐弟澄少孤拊遇猶至首
蔭以官前公數月沒淮東已病猶遣長子暑行護柩歸
遺命復官其子與人交始終如一居家儼恪服用猶未
貴時治郡不求赫赫名處軍事精審明白將卒無不悅
服尤愛惜爵賞每日名器輕假何以示勸有立功者必

奏真命未嘗假版其後朝廷以諸軍借補猥濫或奪或
裁獨所部無之汲引善類惟恐弗及名卿才大夫多公
所薦有文集二十卷奏議十二卷辭章簡重如其為人
某嘗觀國史天聖中契丹講好已二十餘年宿將無在
武備單缺范文正公方為京官奏疏乞命大臣舉忠義
有謀之人次命武臣舉壯勇出羣之士及復唐武舉當
世稱其有王佐才由是入館閣擢右司諫言事鯁挺為
仁宗所知元昊僭切選帥西邊盡瘁經營昊竟納款乞

拜二府值西北交爭麟府奏警自請宣撫河東陝西二敵卒不敢動後歷數鎮而終本朝言文武兼資可為後世法推以為首公以文正嘗守鄱陽師慕其為人故當南北交聘習講文治諱言軍旅之時獨以館職為國遠慮請擇武將遂結主知中歲徧歷言路出使荆襄往來指授兩路晏然及亮授首遂參大政重華初元復以執政督視軍馬悉其智謀方面鞏固和戎定而公歸位元樞歷四鎮遭時遇主出處本末大畧近文正然後縉紳

間皆知儒者果可用也初公薨翰林學士洪公景廬既
歷官行事刻之墓嗣子棹謂某與公同朝嘗贊美攢陵
之議相與至厚復請碑于墓道義不可辭謹提其要而
繫之以銘于是公以諸子升朝累贈至太師銘曰天生
聖人專用仁治蠢茲獫狁常桀以肆念昔三代降漢迄
唐樂天保民運祚以長赫赫高宗紹復大業明明重華
廣聲繼伐叛則征之服則盟之寧抑爾兵母殘我民維
時汪公致位丞輔翼贊兩朝敵威衆附雜耕渭上屯田

先零氣吞幽燕公志則然我車既攻我策既定師干一
試草壺必應大敵挾詐竊窺至仁叩關乞和遂許來庭
上曰歸哉其永予弼公曰止哉盍均于佚征鎮四遷訖
其外庸或出或入有始有終孰不富貴孰不更踐有譽
無疵如公則鮮往在慶厯西征夏臺倚臣曰范迺用招
徠於穆二聖心乎仁祖公慕先正幾踵其武螭首龜鉉
表于墓門文以詩之庸諗後昆

資政殿學士贈通奉大夫胡忠簡公神道碑

紹興

三 年

武王一戎衣而定天下應天順人之舉也義士猶或非之孔孟奚取焉為萬世計也紹興和戎高皇有不得已者矣兩宮未歸母后春秋已高故與大臣決策從權中外議論雖洶洶顧無敢極陳于上前者獨樞密院編修胡公銓上書數百言援大義而伸之大畧謂王倫誘致金使欲劉豫我秦檜腹心大臣道陛下為石晉孫近傅會遂叅政事願竿三人頭羈留彼使與問罪之師時八

年十二月辛亥有旨銓書凶悖叔持其削籍流昭州仍降詔布告中外是日檜近惶恐待罪明日又請收責命不許則乞從末減十二月王倫亦再上章自劾而六曹長二給舍臺諫自晏景初而下多有救解者乃改監廣州都鹽倉明年正月宰執復奏銓書專詆臣等前和議未諧不敢固請以疑羣心今議已定宜稍甄叙乙酉遂改簽書威武軍節度判官廳公事十一年六月之官十二年七月諫議大夫羅汝楫劾公益倡前說用欺羣聽

復除其名勤停編管新州十八年十一月郡守張棣奏
公與客唱酬毀謗怨望移吉陽軍時大臣專國柄小人
觀望迎合必欲置公死地賴天子獨保全之二十五年
冬秦丞相薨乃得歸某竊惟人臣犯顏逆耳上撓人主
之怒下為權臣切齒或誅或斥何可勝數未有九重特
申詔諭二府矯情屢請禁近引誼救止曾不四旬謫命
三改如朝廷此舉之盛者當是時一胡編修名震天下
勇者服怯者奮朝士陳剛中以言餞行至云屈膝請和

廟堂無策張膽論事樞庭有人貶令安遠之死靡憾鄉人王廷珪嘗賦姦諛膽落之詩竄徙夜郎反以為榮下至武夫悍卒遐方裔土莫不傳誦其書樂道其姓氏爭願識面雖金人亦因是知中國之不可輕蓋天理所存自公達之人心所憤自公發之扶世垂教非聖朝之伯夷耶孔孟而在其大書特書也必矣胡氏本金陵人五季徙廬陵公字邦衡曾祖連妣康氏劉氏祖愷贈承務郎妣孺人張氏父載有氣節一試有司不中即棄去贈

大中大夫母陳氏張氏所生母曾氏俱贈淑人公初不
羣強記博覽年二十試太學文不加點建炎二年廷對
行在所考官初以冠多士或畏其切直置第五授左文
林郎撫州軍事判官未上隆祐太后避狄上賴狄師隨
之公以發運司檄攝本州幕官率鄉丁佐官軍扞止第
賞循承直郎就權判官尋丁父憂服除與兄鑄從鄉先
生蕭楚講春秋學無仕進意紹興五年張忠獻公都督
諸路軍馬辟湖北茶鹽司幹辦公事以親嫌易湖南提

點刑獄司俱未行召赴堂審察七年兵部尚書呂祉以
賢良方正薦四月賜對改左通直郎留為樞屬後二年
赴福州終一年踰嶠又六年過海守棣驅公使步往又
諭送吏侵公公不為動吏無所肆其毒既抵珠崖著書
怡然不以死生介意士執經從學多可觀預貢者相繼
赴南宮其後公還朝復請五至省者許勿限年推恩自
是海島頗有仕宦者閱七年始量移衡州又數年乃許
自便三十二年壽皇即位復佐奉議郎知饒州十二月

入對乞修德結民心練兵觀虜釁上曰久聞卿直諒拜
吏部尚書左郎官隆興元年正月遷秘書少監四月擢
起居郎兼侍講國史編修官起居注不應進藁前後殿
皆當侍立遇直前毋白閣門毋隔班次又請移都金陵
時督府北伐克宿州大將李顯忠邵宏淵敗歸勸上毋
以小衄自沮七月旱蝗星變求直言公請勿傲福佛老
躬行周宣王故事罰監司守令之貪殘者其論納諫曰
今廷臣以箝默為賢容悅為忠反謂臺諫論事為賣直

此德宗疑委公輔之語也馴致興元之幸所謂一言喪
邦者上曰非卿不聞此金人再求和公曰彼知陛下銳
意恢復故以甘言詭計疑我願絕口不言和字上嘆其
忠直侍郎王之望侍御史尹穡皆主和排張忠獻公公
廷責之聞者稱快兼權中書舍人特升同修國史公雖
與忠獻善及其子拭賜金紫則謂不當如待勲臣子繳
奏之太上皇后改稱教旨為聖旨公奏大哉乾元至哉
坤元今乃一之如太上皇帝何上曰奉親之過朕當自

受十一月詔以和戎利病遣使可否禮文後先土疆取
予大要詢禁近或勸公從衆公奮曰古有斷頭將軍無
降將軍乃上奏曰京師失守自耿南仲主和靖康播遷
自何梟主和維揚失守自汪伯彥黃潛善主和完顏亮
之變自秦檜主和議者乃曰外雖和內不忌戰此又向
來權臣誤國之言也一溺于和將士解體尚能戰乎執
政讀之失色會中貴人推金字牌賞越舊制公索成法
將論之俄與宗正少卿何備兩易其官公未出省吏白

新舍人至公叱曰命汝取成法何遲也吏懼探懷出之
公函具奏乃緘印上馬去上尋悟中傷之由請外弗聽
猶以侍講夜對上曰敵急欲和其勢甚蹙公乞力任張
俊復可必因再求去上曰卿直諒四海所知且留經筵
事無大小皆以告朕二年二月兼權國子祭酒六月除
權兵部侍郎八月上以災異避殿減膳詔廷臣言闕政
急務公以賑恤為先務議和為闕失於是太學生七十
七人同上書乞再相陳康伯用胡某為腹心進兼侍讀

敵人議國書未合或請末節不必較公曰富弼以死爭
獻納二字今欲君父卑辭下強敵愧弼多矣上聽其言
十一月以邊事改卜郊公言不可者十又大臣主和益
堅公爭之力以本職措置浙西淮東海道命下即趣行
時金寇深入號八十萬淮東郡縣望風退避高郵守陳
敏拒之謝陽湖而大將軍李寶駐師江陰不肯援敏公
檄寶出師寶先嘗取密詔為自安計公劾奏曰臣受詔
令范滎脩淮李寶脩江緩急更相援今寶視敏弗救若

謝陽失守大事去矣寶懼與敏犄角退敵兵時大雪河凍公親刷冰濟舟師人以用命初公與尹穡同出使穡使浙東置家于京公使江淮蓋受敵之地携孥北行實安衆心言者乃併指為罪閏十一月與穡俱罷久之提舉江州太平興國宮乾道五年冬上語諫臣單時思得節誼之士時奏公中興初率鄉兵遏敵事上雅知公陳虞二丞相復薦之遂除集英殿修撰起知漳州未赴六年春改泉州趣令奏事上曰每思卿直諫今朕恢復之

事已決公曰陛下嘗蹕金陵何為中輟上曰以民之不易少需耳留為在京宮觀兼侍講閏五月除權工部侍郎論前修史功進官一等十一月真拜侍郎公言初元經筵七十老臣獨在願乞身歸田里上曰卿忠孝神物護持且留觀朕恢復同載大梁或忌公敢言摘細故雜他朝併撼公冀不得獨留公自以年踰七十遂求致仕詔除文寶閣待制在外宮觀七年三月也未數日特留提舉祐神觀侍講如故上曰卿大節可嘉朕不忍令卿

去未幾受詔舉堪任刑獄錢穀及智畧吏能各二人言者又謂公所舉非其人貶秩二等公知不容力求退進敷文閣直學士再提舉興國宮特許陞辭公奏願陛下任賢黜邪理財訓兵逮鰥恤孤必報國仇必歸陵寢必復故疆上曰朕志也又問卿今何歸公曰臣向在嶺海嘗訓傳諸經今歸廬陵將成此書特賜通天犀帶以寵之公既歸上趣所進書遂上易春秋二禮解詔藏秘書省尋復原官淳熙二年上思公不置諭大臣令進職初

擬稍遷上特升十等遂為龍圖閣學士前此未有也太
上慶七十獨公以前朝龍飛甲科遷朝奉郎祠滿又納
祿上令因任近臣有言秦檜時臣僚被貶斥者後皆還
其所歷歲月惟胡某為議郎將四十年未嘗自列詔特
予四官遂轉朝散大夫三年冬三納祿優詔不允四年
秋秩滿特命提舉隆興府玉隆萬壽宮五年夏上以公
連歲納祿舉大梁同載之言諭大臣使留公仍進端明
殿學士六年冬三省復奏公祠滿上曰銓雖老不衰

昨去國欲他日從朕中原朕常壯其言可召歸處以經筵公引疾力辭因陳時病五事且曰劉珙張栻將死其言甚忠李椿鄭鑑之去國論議皆有補陛下盍念之顧何以老臣為上知公不能來七年春超轉朝議大夫再食興國宮祿公稱疾篤四月加資政殿學士致仕五月庚辰薨遺表猶欲為厲鬼殺賊贈通議大夫官其後三人享年七十有九初封廬陵縣開國男加至本郡開國侯食邑自三百戶積至一千五百戶實封百戶是年冬

十月丙午葬于縣之儒行鄉松山原祖塋之右以子升
朝遇郊恩贈通奉大夫娶劉氏中散大夫湖南提點刑
獄公事敏材女先公卒贈淑人五男泳承務郎監江淮
總領所惠民局兼行宮雜賣場淳熙初卒官漕今為奉
議郎前沿海制置司幹辦公事賜緋魚袋能世其家決
承務郎瀉承奉郎沖未命天五女適從事郎道州司法
叅軍嚴萬全福唐葉昌嗣上饒方自厚通直郎簽書昭
信軍節度判官廳公事賜緋魚袋王宗孟將仕郎王歲

孫男十六人視從事郎奏辟廣南西路轉運司主管文
字榷文林郎監泉州市舶務找承奉郎程机楷挺机
机攢拘樺槎據椅女七人惟公忘身為國首倡正議人
已知敬畏又平居持論鯁挺視權貴有不善趨向有不
正輒奮髯欲扼其吭畧無顧避士大夫以是疑公特立
獨行不可得而親其實篤厚恭寬孜孜樂善常欲以學
道愛人之實施諸有政既不大用于朝嘗三拜二千石
復未及布宣于外故公之剛雖表表愈顯而其仁心則

罕知昔蘇文忠公作剛說謂夫子以剛毅巧言辨仁不
仁深闢太剛則折之說由公視之其信而有證哉公性
孝友在海南聞母喪慟絕水漿不入口一夕鬚髮盡白
當任子先祿兄之子歲時會聚宗族恩義周備收恤貧
弱不計家之有無與朋友交情文兩盡田父野老羸兒
牧夫亦接以禮得其歡心奉身儉約非賓祭食不重味
間被君賜可辭則辭不可辭則以賙人先疇外寸地無
所增識者嘆服公聰明既絕人又能堅忍勤苦聖經賢

傳晝夜繹思古文奇字悉力研究發為文章雄深雅健
清新藻麗下筆輒數百言尤刻意詩騷用事深遠措詞
奇崛後生投贄率次韻以酬多至百韻數十篇愈出愈
工字畫端勁兼通篆隸碑版一出人爭傳玩遂于禮樂
能躬行之冠婚喪祭必遵古訓釋老異端一切屏棄親
舊慶弔寒暑不輟自壯至老始終如一在新興名室曰
澹晚號澹菴老人遂以名其集總一百卷又著易拾遺
十卷書解四卷春秋集善三十卷周官解十二卷禮記

解三十卷經筵二禮講義一卷奏議三卷學禮編三卷
詩話二卷活國本草三卷自公之歿其子以門人今秘
書監楊公萬里所狀行實來求銘某自少知慕公名德
隆興初先後入兩省中間郊居從游幾十年已復遞宿
玉堂凡公文行皆親薰而炙之銘其敢辭獨念官品雖
未應謚而名節如此顧在隱德立園之下耶幸從執政
之後當任斯責暨尸宰事始奉明詔謚公忠簡而郡庠
又以公配祠六一先生然後哀榮兩脩銘公有辭矣銘

曰河入中國地卑而傾屹立底柱其勢乃分江會三峽
湍束于隘截然灑瀕其流乃殺天方驕金帝維念親事
之至難有君無臣斷斷滿朝其瀾孰障言言胡公正論
獨抗鼎鑊刀鋸視之猶無嶺海崎嶇不曰夷塗相欲殺
公彼儉趨公天子仁聖公卒無禍晚儀正朝素志弗移
不會于梁則繫乎時富貴壽考百年之頃孤忠大節干
古惟永懦夫以立清哉伯夷孔孟亟稱公乎得師

文忠集卷三十